

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: E Piti Toata i te Matahiti.

Nu. 10

Atopa 1935

Mat. 29

*Ua na o a hoi oia ia ratou, I haapaohia te sabati no te
taata, aore te taata i haapaohia no te sabati; e teie nei, te Ta-
maiti a te Taata o te Fatu hoi ia no te sabati. Mareko 2:27, 28.*

Te Sabati o te Evanelia nei.

E tuatiraa teie nei parau.

NO te mea hoi e, o te Atua ana'era, e to te ra'i ra,
tei faaea i te mahana hitu, i te faaotiraa i ta'na ra
mau ohipa; e taua mahana faaearea matamua o te Atua ra
e 1000 ia matahiti i to tatou nei tai'oraa. (II Petero 3:8)

I roto i te Ono o te mahana i hamanihia'i o Adamu raua
o Eva, no reira aita'tura raua i ite i te hopea no taua maha-
na faaearea matamua a te Atua a pohe atu ai raua, aita hoi
raua i tae i te 1000 matahiti i te oraraa. E no reira aita'tu-
ra o Adamu mâ i ite i te Ture no te mahana hitu i te fenua
nei.

O Mose râ tei farii i te reira ture i te matamua; aita'toa o Aberahama mâ i ite i te faufaa matamua no reira mai te ture o te Sabati. O te ture Evanelia râ ta ratou i ite e i haapao hoi hou te tuuraahia mai te ture no te Sabati, mai ta Paulo i faaite maira i roto i te Galatia i te pene 3 e te irava 8, 17, 19, 23-25 o tei na ô mai e: " E ua faaite atea mai te parau i papaihia ra, e e tiahia te etene e te Atua i te faaroo, i faaite ai i te Evanelia ia Aberahama i mutaa ihora.— E teie nei, teie ta'u parau, o te faufaa o te Mesia i fafauhia ia Aberahama, e te Atua i mutaa ihora, e ore e tia i te ture, a maha a'era hanere e toru ahuru matahiti i tuuhia mai ai, ia faaore a riro ai tei parauhia mira ei mea faufaa ore.— No te aha hoi te ture *i tuuhia mai ai?* i tuu-atoa-hia mai te reira no te hara. —I mutaa ihora, aita te parau ra i te faaroo i itea mai, i tapeahia tatou i opanihia i roto i te ture, e ia tae i te faaroo e faaitehia mai, *e te Mesia*, a muri atua. Riro atura te ture ei orometua e aratai ia tatou i te Mesia ra, ia faatiahia tatou i te faaroo. Teie nei râ, ua itea mai te faaroo nei, aita'tura tatou i vaiihohia i raro a'e i te aratai. "

To mua'tura ia Mose, ua haapiihia ia i te Ture Evanelia, eiaha na Ture 10 ra mai tei faaitehia nei, no reira aita ratou i ite i te ture 4 o te faufaa i tuuhia mai ia Mose e 430 matahiti i muri mai.

E 430 matahiti i muri mai ia Aberahama, a ora'i Mose, ua taatihia mai te Ture o te faufaa tahito i nia i te Evanelia; no te aha?

No te aaui etaeta e te hara a te tamarii o Iseraela i taatihia mai ai. Ua riro te reira pueraa ture etaeta ei tairiraa e ei papairaa ia Iseraela haapao ore. E huru ê roa to teie tatiraa nei o te ture, e to te ture Evanelia, o tei haamau atu e ua haamau atoa hia maira oia e, *e mata ra, ei mata ia, e niho ra, ei niho ia*. Levitiko 24:20.

I te Evanelia râ, e faaho'ihia te aroha no te ino, eiaha e tahooraa'tu i tei hamani ino mai. Mataio 5:44. Te mau ture 10 e to ratou utua i taati hiara, ua haapaohia ei faufaa mure noa; oia ia, ua tuuhia mai ei Orometua e ei aratai ia Iseraela i te Mesia, e ia tae mau mai te Mesia, ua haapaehia taua taatiraa nei, o taua aratai ia, e ua monohia te reira i ta Iesu haapiiraa. Ua hoperoa taua faufaa matamua i te tupu ia Iesu e ua faatiahia te Ture tahito i ta'na haamauraa i te Evanelia.

Ua na ô Paulo i te parau i roto i te pene 10, irava 9 no ta'na episetole i te Hebera: " Inaha, e tau Atua, te haere nei au e faatia i to oe hinaaro. Ua faaore â ia oia i tei mutaa ihora, ia faatia oia i te piti. " No te mau mea toe e te paruparu i te faufaa matamua i faa-ô-hia mai ai te faufaa piti oia hoi, o te mau ture o te faufaa mure ore mai tei faaitehia i roto i te Hebera 8:6, 7; 7:12, 16-18.

Te Ture no te Sabati mahana hitu, ua tuuhia mai i roto i te faufaa matamua ra o tei faatiahia e o tei faahopehia hoi ia Iesu, e tenana, e faafariu tia mai to tatou mata ia Iesu ia maramarama tatou i ta'na haapiiraa. Ua horoa mai o Iehova i te Sabati ia Iseraela ei tapao faaite e ua fa'au Oia i te faufaa ia ratou e na'na ratou i faataa i te mau nunaa ra. Exodo 31:13; Ezekiel 20:12. Ua haapao-atoa-hia te Sabati ei haamana'oraa no to ratou aratai raahia mai, mai Aiphiti maira. Deuteronomi 5:15.

Te ite nei tatou e, aita te Sabati o te faaueraa maha i haapaohia ei ture tuutuu ore no te mau tau atoa râ no te mea: 1^o no te taatiraa te reira i faaitehia i nia nei, o tei faatiahia e Iesu, e aita hoi te reira ture i parau faahouhia mai e Iesu; 2^o e tapao hoi te Sabati mai te Peritome e tapao atoa ia. Gense 17:11. Ua faaorehia râ te peritome, Galatia 6:15, hoê â faaoreraa i na tapao e piti ra i te tau no Iesu; 3^o ua faa-

hapa o Iesu i te reira mahana, Ioane 5:18, tei ia'na hoi te parau no te reira mahana; 4^o- aita o Iesu, e ta'na mau pī-pī i parau faahou mai i te hoê parau iti noa'e i te faaapīraa i te Ture no te Sabati.

Ahiri e ture mure ore te reira e te faufaa rahi, ua na reira mau ratou, mai ia Iesu i parau faahou mai i te tahi pae o te mau ture ma te faāore i to ratou mau utua. Mataio 5:44; 19:17-20. Ua manū rā ratou atoa i te parau-faahou raa i te reira ture, e iva noa iho ture no roto i na ture 10 ta Iesu i faaapī mai, mai te faarue atu i te mau utua ri'ari'a tahito, e ua amuihia taua na ture e iva nei ei piti tare rahi o te Evanēlia, oia hoi, a *Aroha atu oe i to Atua ra, e e aroha atoa'tu oe i to taata tupu ra*; aita roa oia i parau mai i te ture maha.

Eaha o Iesu i ore i parau faahou mai ai i te Sabati mahana hitu?

No te mea ua haapao oia i te tahi ā mahana; a hi'o i te pae matamua o teie nei parau, e no te mea hoi no te faufaa tahito noa iho te reira mai ta Paulo i parau maira: "Teie nei rā ua itea mai te faaroo nei, aita'tura tatou i vaiihohia i raro a'e i te ture", e teie ā hoi, "Aita outou i raro a'e i te ture, tei raro a'e outou i te aroha." Roma 6:14-15; 3:20.

I roto i te Roma 13:8-9, te haapapura Paulo i ta Iesu i haapii no te mau ture tahito, aore roa oia i parau faahou mai i te ture no te Sabati tahito, ua na ô maira oia i te tahi vahi: "E ara o te riro noa'tu outou i te parau paari e te haavare faufaa ore a te hoê taata'tu, i te parau tutuu a te taata nei, mai te ā rii a teie nei ao ra, — e tena na, eiaha ei taata e faahapa noa'tu ia outou i te maa i amuhia ra, e tei inuhia ra, e te mahana oia ra, e te ava'e apī, e te sabati; e ata ana'e ia no te tupu a muri a'e; area te mea mau ra o te Evanēlia o te Mesia ra. Kolosa 2:8, 16, 17.

A tai'oa atoa i ta Pauro parau i to Roma e i reira e papu roa'itu ai te mana'o e, aita o te ture no te Sabati mahana hitu e mana i nia i te feia mo'a i te faufaa apî nei. Teie taua parau ra: "Te mana'o nei te tahi, e huru ê to te tahi mahana i te tahi; te mana'o nei hoi te tahi, hoê â huru to te mau mahana atoa; ia papu râ te taata atoa i to'na ihora aau. O tei haapao i te hoê mahana ra, no te Fatu ia i haapao ai; e o tei ore e haapao i te mahana ra, no te Fatu ia i ore i haapao ai." Roma 14:5, 6.

Ahiri te vai mana noa nei â te ture no te Sabati tahito i te Evanelia nei, e mana atoa ia te utua no te haapao ore i te reira ture. I te tau i vai mana ai taua ture ra, ua taparahi pohe roa hia te taata o tei ofati i te reira. Exodo 35:2. Ua pohe te ture no te Sabati tahito, e to'na utua ua pohe atoa ia, aita raua i taa ê i to raua oraraa e aita raua i faataa-ê-hia i to raua ra poheraa. Ahiri te vai mana nei te ture tahito no te Sabati i teie nei â, e mana atoa ia te ture Sabati matahiti e te matahiti Iubili tei faaitehia i roto i te Levitiko 25:1-12. Na Iehova te mau haapaoraa atoa o te ture i faaitehia mai, e no reira, eiaha te taata e parau mai e, e ere ia na Iehova te tahi pae ture, no te mea na Iehova i tuu mai i taua mau peu atoa ra ia Iseraela.

E imi rii tatou i te huru no te mahana o te Fatu ta'na ihora i haapao, mai tei faaitehia i nia nei. I te mahana matamua o te hepetoma i tia mai ai te Faaora mai te pohe mai, e ua faaite ia'na iho ia Maria i Magadala ra, e i na pue vahine êê, i na Aposetolo e piti ra a haere atu ai raua i te oire iti ra o Emausa, ia Petero a taa ê atu ai oia i te mau Aposetolo hoê ahuru aore, e i na Aposetolo hoê ahuru ma hoê ra i te ahiahi o taua mahana ra, e ia amuihia, e pae a te Fatu faaiteraa ia'na iho i taua mahana hoê ra. I to Iesu farereiraa i te ahuru ma hoê Aposetolo i taua ahiahi ra, ua tuu

atu oia i te faaueraa ia ratou ia faaite atu ratou i te Evanelia i tana fenua atoa ra. Ioane 20:19-23. Mai reira'tu ua faataahia te reira mahana matamua o te hepetoma ei mahana haamoriraa e ia haapaohia te mau faaueraa o te faufaa apî, ua na reira te mau pîpî i te haapao i te reira mahana ei mahana vavahiraa pane e te a'oraa Evanelia. "E tae a'era i te mahana matamua o te hebedoma ra, ia haaputuputu mai te mau pîpî e vavahi i te pane ra, ua a'o atura Paulo ia ratou." Ohipa 20:7.

E faufaa rahi to teie nei irava i te mea te faaite mai nei te reira ua haapaohia to tatou nei Sabati ei haapaoraa i te mau oroa o te faufaa apî e ua faariro atoa-hia te reira mahana ei mahana aufauraa moni na te feia mo'a i te Ekalesia i Galatia e i Korinetia. I Korinetia 16:1, 2.

Te vai atu ra.

Te Autahu'araa.

Te hoê mau uiraa i nia iho i te Autahu'araa.

Uiraa 1.- Eaha te Autahu'araa?

Pahonoraa. O te mana ia o te Atua i horoahia mai i te tamarii o te taata nei.

Uiraa 2.- Ua vai tamau anei na Autahu'araa e piti i roto-pu i to Iseraela?

Pahonoraa. Aita. No to ratou faaroo ore e te etaeta o to ratou aau, na tamata noa o Mose i te haapii atu ia ratou i roto i te Medebara, e tamata itoitoe ihora oia i te haamo'a i to'na ra feia ia tia ia ratou ia hi'o atu i te mata o te Atua;

ua faaetaeta ra ratou i to ratou aau e aita i tia ia ratou ia faaoromai i to ratou aau; no reira i parau mai ai te Fatu, ma te riri, eita ratou e ô i roto i to'na ra faaeearaa a tere ai ratou na te medebara, e taua faaeearaa ra o te îraa ia o to'na ra hanahana, no reira oia i rave mai ai ia Mose, no rotopu atu ia ratou, e te Autahu'araa mo'a atoa. Area te Autahu'araa iti, ua vai tamau noa mai ia i te utuafare o Aarona, i rotopu i te tamarii a Iseraela e tae roa mai ia Ioane Bapetizo. *B. F. 84:19-28; B. F. S. 83:3-5.*

Uiraa 3.- E mea natea mau te oreraa o te Autahu'araa rahi i rotopu i to Iseraela, i te feia i faatoroahia?

Pahonoraa. Te na ô maira te Peropheta ra o Iosepha SEMITA, ua tuati mau hia te tiaraa o te Autahu'araa i te mau mana o te ra'i, eita ia e faaterehia maori ra i nia i te mea parau-tia ana'e, area ia tamata tatou i te huna i ta tatou mau hara e ia faatupu noa i to tatou iho mau hinaaro e te hiaa'i au ore, e a ore râ ia haavî e ia faatere noa'tu i te tamarii a te taata nei na roto i te parau tia ore, e faarue hoi to te ra'i ia tatou, e oto hoi te varua o te Fatu. E ia faarue hia hoi te tahi e te varua o te Fatu, e amene ia te Autahu'araa o taua taata ra, o te ore roa raa ia o to'na mana. E no te mau huru ohipa parau-tia ore a to Iseraela i faaruehia'i ratou e te varua o te Fatu e i mo'e ai hoi te mana o te Autahu'araa rahi i rotopu ia ratou.

Uiraa 4.- Eaha ia te taime i faahoi faahou hia mai ai te Autahu'araa rahi i te ao nei?

Pahonoraa. Te na maira Mataio: "E rui ono a'era, ua aratai atura Iesu ia Petero, e ia Iakobo, e ta'na taeae ia Ioane i nia i te hoê mou'a teitei, o ratou ana'e ra, e huru ê atura oia i mua ia ratou; anaana'tura tana mata mai te mahana ra, e teatea'tura to'na ahui mai te maramarama ra. E inaha, ua fâ maira Mose raua o Elia i reira ia ratou ra i te

parapauraa mai ia'na. *Mataio 17:1-3*. O te taime mau iho â ia te reira i faahoihia mai ai te Autahu'araa rahi i te ao nei; na Mose o Elia ratou o Iesu i horoa ia Petero, Iakobo e Ioane.

Uiraa 5.- Ua vai tamau noa anei na Autahu'araa e piti i nia iho i te ao nei, mai te reira taime mai â e tae roa mai i te mau mahana hopea nei?

Pahonuraa. Aita, ua faaite atea mai te Peropheta ra o Amosa i te parau a te Fatu i te na ô raa e: " Te fatata mai-ra te tau a hopoi atu ai au i te o'e i nia i te fenua, e ere râ i te o'e maa ore, e te hiaai i te pape, i te faaroo râ i te parau a Iehova; e horo hoi te taata i te tahi miti e te tahi miti; e mai te apatoerau e tae roa'tu i te hitiaa o te râ i te hororaa e te ho'iraa mai, i te imiraa i te parau a Iehova, e ore roa râ e itea. *Amosa 8:11, 12*. Ua faaite atoa mai Ioane i te tahi parau no te mouraa o te feia mo'a e te revaraa te mana i te ra'i. *Apokalupo 13:7; 12:10*.

Uiraa 6.- Eaha te taime i faaho'i faahou hia mai na Autahu'araa e piti i te ao nei, e na vai i faaho'i mai?

Pahonuraa. Te na ô maira Daniela: " E te basileia, e te mana, e te rahi atoa o te basileia i raro a'e i te ra'i atoa nei, o te horoahia ia i te mau taata ra, i te feia mo'a o Tei Teitei, no'na te basileia mou ore ra. *Daniela 7:27*.

I te 15 no Me 1829, ua faaho'i mai ra Ioane Bapetizo i te Autahu'araa a Aarona, e i te ava'e Tiunu ua faaho'i mai ra o Petero, Iakobo e o Ioane pipi here i te Autahu'araa a Melehizedeka; o te mau Aposetolo teie ta Iesu i maiti i to'na tau, e o ratou te hopea o tei mau i te mana Autahu'araa ra, o ta te Fatu i tono mai ia faaho'i mai i taua mana ra i te ao nei, e ua faatoroa maira ia Iosepha SEMIRA raua o Olive TAUDERE. Te na ô maira te Fatu; " Oia atoa ia Petero Iakobo e Ioane, o ta'u i tono atu ia orua na, e na ratou e faa-

toroa'tu-ia orua na i to'u nei i'oa, e ua haamau ia orua ei na Aposetolo e ei ite mau no to'u nei i'oa e ia afai i te mau taviri no to orua toroa. *B. F. 27:12; B. F. S. 27:3.*

E no te mana o teie nei toroa Aposetolo, e nō te faaue-raa a te Fatu, ua faatiahia te Ekalesia i te 6 no Eperera 1830. E ere ia no te Autahu'araa a Aarona i faatia'i rana i te Ekalesia e i faatoroa'i i na Peresibutero e te mau Aposetolo i muri mai; no te Autahu'araa rahi ra o te Aposetolo i horoahia mai e Petero mâ, i na reira'i rana. *O mua mau ia te Aposetolo i roto i te Ekalesia.*

Papahia e Gahau Tu a Keha.

PAPA

E parau faufaa rahi anei ia tatou te parau no te Păpă?
Oia roa ia, e mea faufaa, faufaa roa.

E ara ea te taata i te vahi ta'na e faatia i to'na iho fare, eiaha hoi oia e faatia noa i te vahi one a parauhia hoi oia e, e maamaa. E hi'o haere râ oia i te vahi maitai ei faatiaraa i te reira, oia hoi, te vahi Păpă, te na reira maira o Iesu.

Eaha rê teie păpă e parauhia nei? Na ô, e mataitai tatou i te pen a te feia hamani fare.

Mai te mea aita te tamuta rahi no te faatereraa i te hamaniraa i te hoê fare e parahi mai no te hi'o e te faatereraa i te hamaniraa o te fare, mai te au i te hohoa ta'na i hamani, e mea papu roa ia tatou e, e faahuru ê hia e te feia rave ohipa te hamaniraa o te reira fare na roto i to ratou taa ore i te tahi mau vahi o te hohoa a te tamuta rahi, mai te mea ia vaiiho noa hia ia ratou iho.

E parau papu atoa te reira ia tatou, e te reira mau ihoa te peu e ravehia; ia na reira ra te feia rave ohipa, eaha iho-ra ia te mea i tupu? Maori râ ia, e *Hape!* E huru ê te fare e e huru ê te hohoa a te tamuta rahi.

O IESU MESIA ra o to tatou ia Tamuta rahi i te pae va-rua i te fare ra o te ora mure ore, oia ia, e te hohoa no taua fare mana ra, o te Evanelia ia.

E taa anei ra ia tatou ta'na hohoa i vaiiho mai, tei te ra'i ra hoi Oia ?

Te na ô maira te Peropheta e, *Ua viivii te fenua i raro a'e i te taata, ua hapa ratou i te ture e ua ruri é hia e ratou tei haapao tamauhia ra.* No te aha ra? No to ratou ia taa ore i te hohoa i vaiiho noa hia ia ratou iho; ua faahuru ê ratou i te reira e tae noa'tu ua viivii roa te fenua. Oia te te mau oroa baptizoraa, tuuraa rima, e te oroa a te Fatu—e rave rahi atu â, o ta ratou i faahuru ê.

Aore roa e taata e taa maitai i te auraa o te mau haa-piiraa a Iesu mai te mea aore oia e ûrû hia e te varua e a ore ra te Heheuraa no ô mai Ia'na ra: *o to tatou ia ora.* Te na ô maira te taata paari e: *Ia ore te heheuraa, e pohe te taa-ta.* Maseli 29:13. No te aha? No te mea o te ravea ia e taa'i i te taata te hohoa, oia hoi te Evanelia. Ia ore te taa-ta ia horo ha noa i te pouri i te imiraa i te parau.

O tau Păpă ra ia, oia hoi te *Heheuraa no te ra'i mai;* o te Păpă te reira i faatia'i o Iesu i to'na fare i te anotau ho-pea nei. Daniela 2:44. E taua fare ra, o te EKALESIA A IE-SU MESIA I TE FEIA MO'A I TE MAU MAHANA HOPEA NEI, o tei parauhia ra e, te *Ekalesia Momoni.*

Papahia e Taumata a Mapuhi.

TE MAU PARAU API

Ua faahanahanahia.

I te ava'e Atete i mairi a'enei, ua haere o Andrew JENSON te tauturu papai parau tuatapapa no te Ekalesia, i te fenua ra o Danemark no te afai raa'tu i te hoê pereoo tabito tei ravehia e te feia mo'a no te haereraa i Roto Miti i te matamua. I to'na ho'iraa i Roto Miti ua faaite oia e, ua farii maitaibia oia i taua fenua ra, e te mau feia no te hau e te huiraatira atoa, e ua farerei atoa oia i te Arii o taua fenua ra, o CHRISTIAN X i na minute e hoê ahuru ma pae.

Ua faaite atoa mai oia e, ua tau roa te huru o te taata o taua fenua ra i nia i te Momoni no te mea, i te matamua, ua riro ratou ei enemî, e i teie nei râ, ua riro ratou ei hoa mau no te Ekalesia i teie nei.

Ua noaa faahou mai.

I roto i te ava'e Atete i mairi a'enei, ua noaa faahou mai te manua ra o Philadelphia tei tomo i roto i te tama'iraa tei tupu i Valcour Island i te 12 no Atopa 1776. Ua vai noa taua pahî ra e 159 matahiti i roto i te pape e i to'na taeraa mai i nia, ua iteahia i roto ia'na te mau oivi o te mau mataro o tei pohe i nia i taua pahî ra e te mau pupuhi e te mau ofai tei tutae auri roa.

E ravea paari mau ta ratou.

Te faaitiehia mai nei e, e faaitiehia te ravea i haapaohia no te parururaa i te tino o te taata ra o LENINE tei pohe 11 matahiti i mairi a'enei i te oira ra o Moscou, Rusia. O te hoê ohipa fifi roa te ohipa miri raa tino pohe, e ua peapea te mau taote atoa i te raveraa i te reira, e i teie nei râ, na roto i te ravea i faaitiehia mai e te mau taote Rusia, ua riro atura taua ohipa ra i te ohipa rave ohie e te moni ore; e taua ravea ra o te tapearaa ia i te haumi i roto i te tino, i muri a'e i te miriraahia.

Ua maitihia ei faatere.

I te 26 no Atete i mairi a'enei, ua maitihia, e te Peresideniraa matatamua, o J. Spencer CORNWALL ei taata faatere no te pûpû himene no te

Fare Menemene ei mono no Anatone C. LUND tei pohe a'enei. No to'na ite e te aravihi i roto i te ohipa upaupa e te himene i maitibia'i oia no taua ohipa ra.

Ua haere ratou e mataitai haere.

I te ava'e Atete i mairi a'enei, ua haere e 140 Boy Scout, no Roto Miti, e faaati i te fenua America amui no te mataitai haere i taua fenua ra. I to ratou taeraa i te oire ra o New York ua faahiahia roa tatou i te hi'oraa i te mau fare rarahi o taua oire ra. Te vai ra i reira 100 fare tei tae i te 30 tahua, e 40 tei tae i te 40 tahua, e 15 tei tae i te 50 tahua; e te vai atoa ra e 4 fare tei hau atu to ratou teitei i te 1000 avae e tei hau roa'tu i te teitei, o te Empire State tei tae i te 1250 avae i te teitei e e 120 tahua to roto i taua fare ra. Ua haere teie mau Boy Scout i te mau vahi nehenehe atoa o taua oire ra e ua oaoa roa ratou i te ite mataraa i te reira mau mea nehenehe ra.

Aita te Ati Iuda e hinaaro faahouhia i Purutia.

Te faaitehia nei i roto i te mau ve'a no Berlin, Purutia, te opua nei te hau no taua fenua ra i te faataa te parahiraa o te mau Ati Iuda mai i te tau tahito ra, e te opua nei ratou i te faatia i te hoê ture te opani roa te faaipoiporaa i rotopu i te Purutia mau e te Ati Iuda e te afa Ati Iuda atoa. Te na ô atoa hia ra e faautua etaeta roa hia te taata te faahapa i taua ture ra.

Ua pohe roa raua.

I te 16 no Atete i mairi a'enei ua pohe roa na taata ra o Wiley Post, te taata tei faaati i teie nei ao na nia i te pahi reva, e o Will Rogers taata tuiroo no te ohipa teata. Teie te tumu i pohe ai raua, ua parari to raua pahi reva no te rupehu a tere ai raua na te fenua Alaska.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Paapeete, Tahiti.